



A lokisetse Morena Sechaba se phethehileng (Luka 1,17)

Tel: 28 350 466/ 62600983 (WhatsApp)

# MOELETSI OA BASOTHO

PARARE DOMINO PLEBEM PERFECTAM



**TB e qeta sechaba**

6

**Moruo o theohile**

7



# E JA M14 MILLIONE



**Access Our Books on Akello Library!**

Explore a wide range of our books anytime, anywhere. Visit Akello Library today and start reading!

#ReadAnywhere #AkelloLibrary #ExploreMore

<https://library.akello.co/downloads>

**Follow the link**

bookcentre@mazenodprinting.co.ls

Need guidance? Call/ / WhatsApp: 27 350562 / +266 57396597



**MOELETSI****Boitekolo kamor'a tšebetso****Ha ho tjaka tlhoka koli****Nthabeleng Seitlheko**

**M**orero oa Metsi a Lihlaba tsa Lesotho (LHDA) e tšoare 'moka oa selemo le selemo moo ba tšohlang liqholotso le likatleho tseo ba li fihletseng, ho tloha Ha Katse, 'Muela le Polihali, Maseru ho tloha ka la 26 ho isa la 27 Tlhakubele monongoaha.

Mookameli oa LHDA Tente Tente o hlalositse hore ba hloka sechaba se be le tšepo mosebetsing oa metsi a lihlaba, kaha o tla tsoelapele ho ntlafala le ho arabela litlhoko tsa mebuso e 'meli ha ba sebetsa 'moho. A re ba lula ba tsitsitse litabeng tsa bona ho sechaba se amehileng le ho leka mekhoha eohle ho bona hore sechaba



sea ntlafala.

A re ba hloka ho nka boeletsu ba sechaba ba tsebe ho tsoelapele ho ntlafala le ho sebetsa 'moho le mekhatlo, hobane sepheo se seholo ke hore ba kopanye matsoho ba tle ka litharollo tse feletseng litabeng tse amanang le morero le sechaba.

Ke hona 'mokeng ona, moo 'Musi oa Setereke sa Butha-Buthe Tšepa Chaba, a bontšitseng hore LHDA e etsa mosebetsi o motle empa ha e tsamaisi litaba tsa khiri ea sechaba literekeng ka tsela e nepahetseng, ka hona ho bohlokoa hore e ikamahanye le litaba tsa sechaba le ho bona hore e phethahatsa merero eo ba e tšepisitseng sechaba.

Ha 'Musi oa Setereke sa Maseru Tšepo Lethobane, a kopile morero ho etsa tšalo morao litabeng tseo o li tšepisitseng sechaba. O re ba tšoare mamphela ka se-

kotlo hobane sechaba se se-boko ke tšebetso e bohlasoa ea morero le mekonteraka e etsang mosebetsi kaha ba sa natse sechaba ba itšebelsetsa feela.

Ho feta mona baemeli ba sechaba ba libakeng tseo morero o sebetsang ho tsona, ba tekile likatleho le liqholotso tseo ba tobaneng le tsona tšebetsong ea bona.

Obert Morojele ho hlaha Mokhotlong, Maluba-lube, o hlalohalositse hore LHDA e fane ka matšelisano ho sechaba sohle ho se khethollo, ka hoo sechaba se qalelle ho koetlisoa ka litaba tsa likoporasi le merero e meholo e le hore ba tle ba tsebe ho ikemela.

O itse boholo ba batho ba Mokhotlong ba hloka ho fuoa chelete ea bona e feletse, empa qetellong ba fuoe lith-

ho phela ho tsona. A ipiletsa hore ba ke ba rupele baithuti ba metseng ena, hore qetellong bacha ba libaka tseo ba tsebe ho iketsetsa.

Leha hole joalo, sechaba sa Katse se thoholelitse LHDA ka ho lokisa litaba tsa tikoloho, ho bona hore ba sireletsa mekhoabo le makhulo le ho ba tšehetsa ka litaba tsa bochaba. Ba boetse ba re le bacha ba se ba fumana mesebetsi ka sebakeng sa lihloholoeng. A re ba kopa ho lokisoa litsele tse kenellang kahar'a metse, molemong oa hore bahahlauli ba tsebe ho fihla libakeng.

O khothalelitse hore litšiane tsohle tse kenang kahar'a naha ka lebaka la morero li ke li fuoe LHDA, li tlosoe matsohong a 'muso e le karolo ea ho nolofaletsu LHDA ho etsa mosebetsi.

Mookameli oa Morero oa Polihali Gerard Mokone, o itse ba lokela ho amohela hore ho na le tiehiso ea ho lefshoa ha batho, ba batla ba sa lumellane hantle le boetapele ba sechaba kaha tlhahlobo ea manane a batho ba neng ba ngolisitsoe ho hiroa tšebetsong ea morero e ntse e etsoa. A re manane ao a hlahlobiloe e le ba hirioloeng le ba sa hiroang. O re litabeng tsa matšelisano sechaba sa Polihali se arotse ka libaka 'me ba fana ka ona ba ipapisitse le hore na libaka tseo ba t'li ama ke life.

O re batho ba t'li angoa ha ba fuoe matšelisano pele ba ameha, 'me khothalelitse ke hore batho ba e-s'o angoe ba tsoelepele ho hlalisa lijo masimong a bona ho fihlela nako ea ho emisa e fihlele.

Ka lehlakoreng le leng, Mekhatlo e Ikemetseng, e hlalositse hore morero o lokela ho ela hloko litaba tsa Litokelo tsa Mantlha tsa Botho, ha ho etsoa melao, maano le litaba tsa sechaba li lokela ho kenella litabeng tsohle. E re hona ho tla thusa hore sechaba se kenye letsoho ntlafalolong ea morero le kabong ea mesebetsi kaha ba tla le monyetla oa ho bona tsela eo lintho li tsamaeang ka eona.

E re ha ho ntlafatsoa sechaba LHDA e lokela ho se khetholle empa e kenyeletse batho bohle litabeng tsa merero e meholo haholo litabeng tsa ntlafalo ea moruo joaloka merero ea ntlafalo ea sechaba.

**M**orero oa Metsi a Lihlaba tsa Lesotho (LHDA) o entse taba ea bohlokoa haholo ka ho tšoa 'moka, moo o tšohlang kapa hona ho hlahloba tšebetso ea ona le mafapha ohle a amehang. Le hoja ho bonahala ho e-na le liphoso kapa liqholotso tse tobileng morero haholo mabapi le lithuso kapa litokelo tseo o lokelang ho li phetha sechabeng, ho nts'o ho e-na le lintle tseo sechaba se li supang kannete, liamahale li teng tse rehelletsoeng ka LHDA. 'Nete ke hore matsoho ho lutla a sebetsang, etsoe ea bohloko o ithuta kamehla ka hona morero o tla lokisa moo e bang liqholotso li teng e le hore tsohle li tsamaee ka thello.

Matona a ne a buella makala a ona ka ho fapakana paramenteng hore a abeloe chelete ho phetha mosebetsi oa sechaba. Letona la Lekala la Toka le tlohile Ntlong ea Bakhethoa sefahleho se khanya khotso, hobane ntlo e amohetse kopo ea hore Komisi e Ikemetseng ea Likhetho (IEC) e ekeletsoe chelete hobane e na le mosebetsi o mongata. Maparamente a mang a tlatsetse 'me a bontša hore haufinyane ho tla etsoa likhetho mabatoeng tse hlohang chelete hore li etsahale ka nepo. Ha chelete e kopeloa mosebetsi ha ho khang, empa e fele e etse mosebetsi e se re bone kapa ho utloa ho fapakaneng le seo e se kopetsoeng.

Ho na le sebaka se Seterekeng sa Mafeteng se ileng sa kenya naha litabeng, ea qosoa ka lebaka la sona, sa phelo sa motlakase oa letsatsi motseng oa Ha Ramarothole. Leha litaba tsa makhotla li sa ile moriting ho ntso ho e-na le lingongoreho ka sona, hobane kajeno ho hlahella hore lekala le se le lahlehetsoe ke bokhothokhotho ba chelete e kaalo ka M14 Million. Tlhaloso ke hore e sebelisoa ho thibela khoholeho ea mobu e etsahalang sebakeng. Ho hiroa batho ka mekhahlelo ka letšolo la fato-fato, ba ntšanang hofihlela ba felile eba b'a ipheta. Feelha ho tlahloa sepheo sona e se phethile sa ho thusetsa ho nyolla motlakase ho thusa Kampani ea Motlakase ea Lesotho (LEC) le ho theola litjeo tsa theko ea motlakase ho hlaha Afrika Boroa.

Ofisi ea Monamoli eo esale e sebetsa e le 'ngoe hobane e batla hore litlaleho tsa eona ebe tse nang le ponaletso le ho amoheloa ke sechaba ntle le lekhoneho, kamor'a boitekolo e kene selekaneng le Ofisi ea Littlelebo tsa Sechaba ka Sepolesa (PCA). Tšebeliso 'moho ena e tla thusa Ofisi ea Monamoli hara tse ling ho fumana litaba kapele haholo tse amanang le liphuputso kapa lipatlisiso tse etsoang ke sepolesa ka kotloloho. Hona ho bolela hore bosebelisi ba sechaba bo ntse bo nona le ho matlafala, ha e le mona mafapha a thusana. Mohoma temeng, ho sebeletsoe sechaba sena sa Basotho.

Setsi sa Lesotho sa Litšebeliso tsa Likhetho (RSL) se entse letsoho la monna ka ho aha matloana a tla sebelisoa nakong ea lipapali Boemafofaneng ba Sesole sa Lesotho ba Mejamentalana. Kominishara ea RSL e itse ha se sesole feela se tla una molemo mpong eo, le sechaba nakong ea lipapali se tla imona monoana. E itse taba ena e mpe e be khothatso ho bacha hore ba ikakhele ka setotsoana lipapaling, tse thusang ho chorisa likelello tsa bona le ho ba qobisa ho etsa litlolo tsa molao.

Motlatsi oa 'Musisi oa Banka e Kholo ea Lesotho (CBL) o itse moruo oa naha o thefolehile haholo, 'me sena se bakiloe ke khaho ea litsela, tlhahiso e fokotsehileng haholo ka lifemeng 'moho le tšebeliso ea lipalangoang. Leha ho le joalo moruo lefatšeng ka bophara o ntse o tetema ka hona Lesotho le ke le e-ba mokhelo. Tlhaloso e tlaase ea poone e tšoeu e bakile hore litheko tsa lijo li nyolohe ka 4.1% ka khoeli ea Hlakola, ha li tloha ho 3.6% khoeling ea Pherekhong monongoaha. Litheko tse ling tse nyolohileng ke tsa motlakase, lino le khase.

**MOLIMO A BOLOKE LESOTHO LE BASOTHO**

Contacts: +266 28350 466

62600983 WhatsApp

Email: [newsroom@moeletsiobasotho.co.ls](mailto:newsroom@moeletsiobasotho.co.ls)

Sales and Marketing: (+266) 28 350 466/ 57396597 (WhatsApp)

**MOELETSI oa BASOTHO**  
A LOKHETSE MORENA SECHABA SE PHETHEHLING (LUKE 1,17)

**Editorial**

Lesoetsa Rakubutu

(+266) 6203 1949 / 58490670

EMAIL: [editor@moeletsiobasotho.co.ls](mailto:editor@moeletsiobasotho.co.ls)

Mohale Lehlohonolo (Sub-editor)

(+266) 58 771 507 / 62 771 507

**Journalists**

Nthabeleng Seitlheko

57 665 038/ 68 216 271

Tšelisano Thakholi

58 540 853/ 63 480 404

**Production Desk: 'Mateele Liqa**



# Ha Ramarothole e ja M14 Millione

## Nthabeleng Seitlheko

**K**e bonyane M14 Millione e seng e sebelisitsoe nakong ea lilemo tse peli ho loantša kholeho ea mobu, e bonahetseng e ba teng sebakeng sa khaho ea motlakase oa letsatsi o Ha Ramarothole Seterekeng sa Mafeteng. Litaba tse na li boletsoe ke Mookameli oa morero oa Lesotho Electricity Generation Company 'Mathabo Mahahabisa, puisanong le Koranta ka la 24 Tlhakubele monongoaha.

O supile hore chelete eo e sebelisoa ho etsa mesebetsi ea fato-fato moo ho hiroang batho ba 500 ba kenang ka mekhahlelo ea batho ba 40 'me ha ba qetile ho potoloha b'a ipheta ho latela tšebetso.

A re pele ba ka sebetsa sebakeng sena ho ile ha etsoa tlhahlobo ea sebaka, le lihloiloeng tse fumanehang sebakeng seo, 'me tlaleho e ile ea fanoa, ho bona hore sebaka seo se lula se bolokehile. O re ba atlehile ho kopanela tšebetso le Morero oa Metsi a Lihlaba



tša Lesotho (LHDA) ka bahlanka ba eona ba seng ba e-na le litsebo ka polokeho ea tikoloho le boieane ba tlholeho le tikoloho ho fana ka tataiso mabapi le litaba tseo e bang b'a li fumana sebakeng.

O re ho ntlafatsa sechaba se phelang sebakeng seo, ba sebetsa le liitsi tse hloailoeng ho tataisa sechaba seo ka mekhoha ea boipheliso ka hona ke libaka tse tharo tse tla una molemo kaha ba sa ingolisa ka mekhatlo ea bona.

Ho fihlela ha joale motlakase o hlahisoang sebakeng sena ke oa boleng ba

M90 Millione o seng o filoe Kamphani ea Motlakase ea Lesotho (LEC), leha ho le

joalo chelete e sebelisoang morerong ona ke mokitlane o hlahang Naheng ea China, oo naha e fuoang lilemo tse hlano ho qala tšebetso eba kamor'a tsona e qala ho lefa.

A re ho ntlafatsa tšebetso ea bona ba t'l'o aha sethala sa pokello ea motlakase ho bona hore ha letsatsi ha le le sieo motlakase o lula o fumaneha.

Morero ona o ne o thakholoe ka selemo sa 2021, oa nehelanoa semmuso ka khoeli ea Phupu 2023 'me sepheo sa ona ke ho imolla naha ka litjeo tsa theko ea motlakase ho tsoa ho Eskom ka ho hlahisa motlakase oa 30 megawatts o tla nyolohela ho 80 megawatts.



# Monamoli o tlabola selekane le PCA

## Nthabeleng Seitlheko

**O**fisi ea Monamoli ka kopanelo le ea Littlelebo tsa Sechaba ka Sepolesa (PCA), li tlabotse selekane, e le ho nanabetsa letsoho tharollong ea litaba tse amanang le khatikelo ea Litokelo tsa Mantlha tsa Botho. Litaba tse na li bile ka la 24 Tlhakubele monongoaha.

Mookameli oa PCA Adv. Makhetha Mots'oari, o hlalositse hore mosebetsi o moholo oa selekane sena ke ho tla sebetsana le litaba khatikelo ea Litokelo tsa Mantlha tsa Botho, kaha ba ikemetse ba t'l'o sebetsana le litaba ba sa nke lehlakore. Ofisi ena e thehiloe ka molao oa sepolesa oa 1998.

A tsoelapele hore mosebetsi o moholo oa bona ke ho sebeletsa hore mapolesa a sebetsa ka tsela e nepahetseng le sechaba, hape ba khutlise seriti sa sepolesa le tšepo ea sona ho sechaba. A re tšebeliso 'moho e t'l'o matlafatsa litaba tsa lipatlisiso moo e bang monamoli o li etsa

ka sepolesa kapa ho na le molli, ba tlo nolofalloa ke ho tšoarana ka matsoho le ho baleha tiehiso tšebetsong ea bona.

O re seo ba se hlokom-

hore qetellong ofisi ena e tle e ntšoe kahar'a molao oa sepolesa e ikemele hore e tle e bulehele bohle le ho ba nolofaletsa ho etsa mosebetsi.

mang 'moho le mekhatlo e ikemetseng hobane ho na le moo ba kopa- kopanang ho latela mesebetsi ea bona joaloka tšireletso ea Litokelo tsa Mantlha tsa Botho.

Ofisi ea habo o re ha e sebetse ka litlolo tsa molao kapa batho ba qosanang, empa e sebetsana le litlitlebo tsa moo sechaba se haketsoeng. O re tšebetso



etseng ke khaello ea tsebo ho sechaba, leha ho le joalo ba se ntse ba sebetsa kaha littlelebo tse tafoleng ea bona li ngata, le hoja ba liehisoa ho etsa mosebetsi ke ho kopa tumello ho letona. A re ba ntse ba khothaletsa

Monamoli Adv. Tlotliso Polaki, o hlalositse hore ofisi ea habo ka nako e telele e sebelitse e le 'ngoe ho se liitsi tse ling kaha ba ikemetse, empa khabareng ba hlokomela hore ho na le moo ba hlokanang le mafapha a

O itse ba t'l'o lula ba sireletlitse litaba tsa sechaba ntle le lithahasello hobane ba hloka litlaleho tsa ofisi ea habo li lule e le tsa boleng, tse amoheloang kahar'a sechaba li sa rehlooe ka letho.

ena e t'l'o thusa hore ba nolofalloe ke ho etsa mosebetsi kaha ts'ehetso ea lichelete e ntse e qepha, mosebetsi oa bona ke ho lisa 'muso ho latela molao-theo, ka hoo ha ho kamoo ba ka tsoang liqeto tseo tlaase.



# RE TŠEHETSA BACHA

## Tšeliso Thakholi

**R**e ile ra buisana le e mong oa bacha ba Lithabaneng, Thato Jane (27) ka sepheo sa ho tsebatsa mosebetsi oa hae o motle oo a o etsang oa ho foroma litene tse putsoa le tsena tse etsoang ka mobu. O boetse o etsa le litene tse khabisang mabaleng a matlo, mebiling, likolong le libakeng tse fapakaneng. Mesebetsi ea mofuta ona ho na le bacha ba bangata ba sa lumeleng hore e ka etsoa ke mocha molemong oa tlhahiso ea mesebetsi ka morero oa ho iphelisa.

### Na ho sebetsa ke ho hiroa?

Bacha ba heso ba lokela ho tseba hore ho sebetsa ha se feela hore motho a hiroe, empa le mesebetsi e fapakaneng ea matsoho eo bacha ba ka ithahisetsang eona, ho latela litsebo le boqapi ba bona ba ka tseba ho iphelisa metseng le metsaneng moo ba phelang teng. Mesebetsi e teng kantle ka mona ho sa khathellehe hore na motho o fi-

na ba ka ea sekolong ho ea lintlafatsa le ho li beha mae-mong a hajoale a bophelo. Talenta li teng!

### Na ho itšebeletsa ho monate?

E, ke 'nete ntate ho itšebeletsa ho monate ho feta ho hiroa hobane ha ho na motho ea tla 'ne a u laole mosebetsing oa hau. O tsoha ka nako e batloang ke uena le ho robala ka nako e batloang ke uena feela u lokela ho etsa ka matla hore u phetha mosebetsi oa hau hantle, ka nako le ka makhethhe. Ke rata ho tiisa koranteng ena ea Basotho hore leha mocha a rutehile a ka iketsetsa mesebetsi ea matsoho joaloka temo, ho roka, ho etsa litene le e meng e mengata molemong oa ho iphumanela mekhoha ea ho iphelisa. Mangolo a hae ona ke monyetla o tla boela o mo bulela likhoro tse ling tsa bophelo a sa ema feela, empa ka nqena a ntse a itšoarela ka matsoho. Qetellong a ka iphumana a etsa mesebetsi e 'meli kapa e mengata e leng ea matsoho le ea mangolo a hae.

### Ak'u bue ka uena

'Na ke mohlahisi oa mofuta e fapakaneng ea litene. Ha ke ea li ela sekolong empa



ke ile ka ithuta tsona ha ke ntse ke kena Sekolong se Seholo sa Sechaba (NUL). Ea re ha ke qeta ka 2021 ha nka ba ka emela ho ea batla mesebetsi oa mangolo a ka hoba ke entse botichere, empa ke ile ka tsoelapele ka tšebetso ea ho foroma litene. Ke ile ka fumana lithupelo bakeng sa ho motlafatsa litsebo tsa ka. Kajeno kea bona hore bophelo bo teng mona tlhahisong ea khoebo ea litene, 'me ha ke utloe eka ho ntse ho hloka hore nka ea batla

mosebetsi oa ho ea ruta.

### Na ke mosebetsi oo u qalileng u o rata?

Ho bua 'nete, ha se mosebetsi oo ke neng ke o rata haholo, empa ke ile ka bona hore bophelo bo teng mona 'me ka ikhethela ho ea etsa litene ka tlohella botichere moo motho a tla emela ho fumana chelete mafelong a khoeli. Athe mona ka letsatsi ke ntse ke etsa M4,000.00 kapa ka tlasana hanyenyane ha ho thoe tšebetso ha e'a ba ntle. Hantle 'na ha ke motho ea ratang ho hiroa

ke rata ho itšebetsa haholo hobane ha ke batle chelete ea mafelo a khoeli ke batla e kenang letsatsi ka le leng, kaha e re thusa ho fokotsa mekitlane e sa hloka haleng le ho bona hore bophelo ba letsatsi ka leng bo tsamaea hantle.

### U sebetsa le mang hajoale?

Ke sebetsa le bacha ba bahlano bao ke ba hirileng ha bang ba bane ba e-tla feela nakong eo mosebetsi o leng mongata.

### U batla ho fihlela'ng ka mosebetsi oa hau?

Seo ke batlang ho se fihlela ka mosebetsi oa ka ke hore ke iphumane khoebo ea ka e se e holile e se e tseba ho rekisa litene kantle le kahare ho naha. Ke batla khoebo ena ea ka e hole e pharalle le Naha ea Lesotho.

### Keletso ho bacha

Bacha ba heso ha re itšoarelang ka matsoho re sa khethe mesebetsi, feela re ke re iqapele mofuta e mengata ea likhoebo. 'Na hona joale ntle le ena ea litene ke se ke ntse ke nahana ho iqalla e 'ngoe ea mofuta oa eona e sieo kahare ho naha, feela ke tla u mema ha ke se ke qalile. Ha joale ke sa ntse ke phehile e ka pitseng ke tla u joetsa ha ke tšotse u tlo ja masutsa.



hletse boemo bofe ba thuto. Bacha hlahisang litalenta tsa lona le tsebe ho iketsetsa mesebetsi le tlohelle ho sotleha. Ke hlokometse hore bacha ba bangata ba lutse ba phuthile matsoho ka litsebo le litalenta tseo ba nang le tsona. Tse ling tsa litalenta tseo ba nang le tso-

**Listen To Us Here**

**92.6 fm bokamoso**  
Mafeteng  
Mohlale's Hoek  
Qach's Nek  
Quthing

**97.4 fm bokamoso**  
Maseru  
Berea  
Leribe

**98.2 fm bokamoso**  
Mokhotlong  
Thaba Tseka  
Butha Buthe

[www.bokamoso974.co.za](http://www.bokamoso974.co.za)



# Le fokoletsoa chelete

## Nthabeleng Seitlheko

**L**etona la Mesebetsi e Mehola le Lipalangoang Mohlomphehi Matjato Moteane, o re ba ikemiselitse ho hlaola liphoso tsohle tse bona-hetseng tšebetso ea bona, ba qala litaba bocha molemong oa ponaletso ea tsamaiso tšebetso ea lekala la habo. O boletse tsena nakong eo a neng a kopela lekala chelete Paramenteng, ka la 24 Tlhakubele monongoaha.

O re seo ba lokelang ho se etsa ke ho phethahatsa tšepiso e ileng ea etsetsoa sechaba sa Thamathu le metse e pela ona, Seterekeng sa Qacha's Nek, ea ho etsa tsela kaha ho bonahala bahahlauli ba rata ho etela libaka tseo.

Ha e le tsela e neng e qaliloe Leribe Moreneng ho ea Butha-Buthe e'a phetheloa kaha e se e le ho 95%, hape a re ba atlehile ho aha borokho ba Ha Tseka, Peka le Pena-Pena. O re ba tsoisitse matšoao a tsela ea Mo-shoeshoe Road le Kofi Annan e seng e tsamaeaa. O supile ha tšebetso ea litsela e na le ho fapakana hobane ka nako e 'ngoe ba etsa phano ea litsela moo ho se ntseng ho tsamaeaa.

Ka lehlakoreng le leng a re ba phethetse marang-rang a ngolisang likoloi mebileng kaha sesebelisoa seo se sebelisoa ke mapolesa ka mehala ea thekeng, sona se hlalisoa boleng bohle ba koloi, ka hona ho se ho tla sebelisoa marang-rang ho hlahloba likoloi sechaba se se makale.

Ho ntlafatsa khaho ea litsela le khokelo ea tsona metseng, o re ba phethetse leano la tataiso ea litsela le tla thusa ho tataisa letona lefe kapa lefe hore selemong seo ho lokela ho hokeloe litsela life le tokiso e etsoe kae, eseng letona le etse tsela ho latela hore na lona le hloka hore e etsoe kae. A re leano leo le tla nka bonyane lilemo tse 20, 'me le tla sebetsa ho fihlela 2044, tseo tsohle o

bontša ba tla li etsa ba ipapititse le hore na ba hloka moruo o hole lehlakoreng lefe la sechaba.

O itse ba boetse ba kene leetong le matla la tokiso ea boemafofane ba Lesotho, le hoja tšebetso ea bona e na le ho liehisoa ke theko ea thepa e etsoang kantle ho naha empa ha joale ba se ba atleha ho amohela baeti le bosiu hobane mabone a se a le teng ha ho sa tšoane le pele moo ho neng ho nkoa maeto motšeaere feela.

Lekala lena selemong

sena sa lichelete le abetsoe M220, 570,534 Millione, ha Letona la Lichelete Dr. Retšelisitsoe Matlanyane a ile a theola chelete ea maeto ea lekala leo ka M1, 434, 772 Millione.

Ho sa le joalo, Hlalele Letšaba o hlalositse hore ha ba na mabaka a ho hana ho tlatsetsa taba ena, hobane ha Lekala la Mesebetsi e Mehola le sebetsa, sechaba se phelang mabapi le moo tšebetso e etsahalang se fumana mesebetsi. Mesebetsi o moholo oa lona ke ho isa litšebeletso sechabeng le batho ba kantle ho naha ba atleha ho etela naha.



## IEC e'a ekeletsoa



## Nthabeleng Seitlheko

**L**etona la Toka le Molao, Mohlomphehi Richard Ramoetsi, o tlohile paramenteng a bososela kamor'a ho ekeletsoa chelete kopong ea ho abela Komisi e Ikemetseng ea Likhetho (IEC), ka la 25 Tlhakubele monongoaha.

Keketso ena e entsoe ke Letona la lichelete le Ntšetsopele ea Meralo, Dr. Retšelisitsoe Matlanyane, a supa hore bao ba ekeletsoe ka M250,000 e le chelete ea maeto hobane ho ile ha e-ba le khaello nakong e fetileng e bileng ea ama tšebetso ea IEC, haholo tokisong ea manane. Ramoetsi o ne a entse

kopo ea hore IEC e abeloe chelete e kaalo ka M139 Millione, e tla sebetsa e le ea meputso ea bahlanaka le chelete ea ho etsa mesebetsi.

A re ba boetse ba tl'o tsoelapele ho ntlafatsa lenane la bakhethi 'me ka khoeli Phupu monongoaha ho tla ba le likhetho-pheto libakeng tse ling le litaba tsa tokisetso ea potso sechabeng. Ke hona tšebetso ena moo ho tla boela ho koetlisoa mekhatlo e ikemetseng e tla fana ka thuto sechabeng mabapi le litaba tseo.

IEC e abetsoe chelete e kaalo ka M139, 258, 888 Millione, selemong se hlimo sa lichelete.

Moparamente oa Kobo-Tata ea Basotho (ABC) Montoeli Masoetsa, o ile a tlatsetsa taba ena ka le reng IEC e lokela ho fua che-

lete e tla e nolofaletsa ho etsa mesebetsi, e kang ho tšoaroa likhetho mabatoongeng ao bakhetho ba ona ba seng ba le sieo.

Ha Moetapele oa UAT, Dr. Mahali Phamotse a supile hore IEC e lokelela ho fua chelete hore mesebetsi oa eona oa ho fana ka thuto sechabeng o tsamae ha bobebe. A re letona le bone hore tokomane e lumellang IEC ho sebeletsa moahong oo e leng ho ona e-ea khoasoa moo e teng kaha ho itsoe moaho o rekiloe. O re ba hloka ha ba abetse mafapha lichelete li sebelisoa hantle molemong oa ponaletso.

Ka lehlakoreng le leng Lesotho le fetoa ke metsuntsunyane le menyetla e mengata haholo e neng e ka tsoela baahi molemo linaheng

tsa machaba, ka lebaka la khahello ea matlo a boemeli ba Lesotho linaheng tseo. Tsena li boletsoe ke Letona la tsa Machabeng, Mohlomphehi Lejone Mpotjoane, ha le kopela lekala la habo chelete paramenteng.

Litho tsa komiti ea kabo ea lichelete, li buile le eena ka matla hore a il'o lokisa bolulo bo seng botle ba boemeli ba Lesotho Machabeng, a tlalehe maputulo a ba ronngoeng le hore ho se hlole ho isoa batho ba likipa tsa lipolotiki, ba bonahalang ba iketse phomolong ba sa tsoele naha ena molemo.

O supile hore 90% ea chelete eo a e kopang e tla sebetsa kantle ho naha ena, ka lebaka leo o fokolitse chelete ea maeto ea lekala ka M6 Millione, 'me litho tsa lumellana le eena.



# TB e qeta sechaba

## Nthabeleng Seithleko

**K**e bonyane Basotho ba 13 ho ba 100 ba hlokalang ka lebaka la ho lieha ho fumana pheko ea Lefu la Lefuba (TB). Litaba tsena li hlahetse polelong ea Letona la Bophelo, Mohlomphehi Selibe Mochoboroane ketekelong ea letsatsi la Lefatše la Lefuba, ka la 24 Tlhakubele monongoaha.

O re motho hore a be a fumane pheko e lokelang o lokela bonyane a hlhelle setsing makhetlo a mararo 'me lingaka li netefalitse seo. Ha joale Naha ea Lesotho e boemong ba 37% kalafong ea TB, 'me 13% ke bakuli ba ntseng ba fuoa kalafo ha 3% e le ea ba lahlehetseng har'a tsela.

A bontša ha e le bonyane 43% ea Basotho ba sitoang ho sebetsa le ho iphelisa ka lebaka la ho angoa ke lefu lena.

Lesotho le balelloa har'a linaha tse tlokotsing ea litlhare tsa TB le HIV/ AIDS empa naha e reka litlhare ka 83% ebe 17% e fanoa ke global fund. A re Basotho ba khobe matšofo kaha litlhare li le teng, 'me 'muso o leka mekhoe eohle ea ho baballa bophelo ba sechaba.

Mookameli Lefapheng la Phano ea Litšebeliso tsa Lefuba Dr. Llang Maama, o hlalositse hore lefuba le hlhlojoa ka seipone le lipotso kaha motho a ka ba le lefuba a sa tsebe. O re batho ha ba se na tsebo ba sitoa ho etsa liqeto tse nepahetseng haholo tsa ho hlhlobela lefu lena.

O itse ba hlokometse hore bakuli ba bang ba lefuba ba fihla setsing ba se ba kula haholo hobane ba liehile ho tseba ka lona, ka hoo ho matlafatsa litaba tsa thuto ba ntse ba etela likolo ka ho fapakana le ho tsoarela sechaba lipitso 'me tse ling li tla etsoa ho matahantsoe litšebeliso tsa bophelo hore sechaba se hlhlojoe.

A re ho na le qholotso ea

lefu lena kahar'a naha ka lebaka leo Basotho ba se ke ba sheba lekala feela hore le fane ka thuso empa le bona ba nke boikarabello ho le hlhlobela le ho tšehetsa bakuli ba lona.

Mookameli oa Partners for Health Retšepile Tlali, o hlalositse hore lefuba ke lefu le teng, 'me tleho ea Mokhatlo oa Lefatše oa Bophelo (WHO) e hlalosa ha e le bonyane batho ba 1.2million ba bileng le lefu lena selemong sa 2023. O re le bonahala le bolaea bahloki haholo kaha ba si-

toa ho fihlela litsing ka nako le ho sebelisa litlhare le ho ja ka nepo. Ke bonyane 37% ea batho ba nang le lefuba ba lahlehetseng ke bophelo ka lebaka la ho lieha ho fumana kalafo.

A hlalosa hore leha ho le joalo 42% e fumane kalafo, ka hona ho arabela qholotso ena ba fana ka thuto sechabeng, moo ba tsomang ba nang le lefu lena, ba ba fa pheko, ho hlhlojoe batho bohle le ba tlokotsing hore ba tsebe ho fuoa litlhare tse phekolang ka nako.

H'a phethela o itse ho

bohlakoa hore sechaba se hlhlojoe e le hore qetelong ba tsebe ho fuoa kalafo haholo batho ba se nang matšoao.

"Lefuba ke lehlanya le hlakang ho bokaneloa." A rialo.

Ka lehlakoreng le leng, Ofisiri e Ikarabellang Litabeng tsa Lefuba Lefapheng la Bana Mpho Khesa, o bontšitse hore ba thusa batsoali hore na ba ithokomele joang, haeba a e-na le TB hore a se ke a tsoaetsa ngoana. A re ha ngoana a se a hlhile, ba sebelisa sekhohlola, man-

tle a bana le seipone ebile ngoana ea belaeloang a sa fuoe ente ea tlhaho hanghang, o hlhlojoa pele.

A re ba ntse ba fumana bakuli ba lefuba ba litlhareng ba sa qeteng nako ea bona ea kalafo, empa kaha ba sebetsa 'moho le basebeletsi ba tsa bophelo metseng ba fana ka tšehetso le thuto ho bakuli ba joalo hore ba qetelle ba ikamohe-tse le ho sebelisa litlhare ka nepo.

Monongoaha mohoo ke, "Re ka felisa Lefuba, Itlame, Tsetela, Sebeletsa."



**The process is as important as the goal**

**W**e all wish for success in life but most of us don't want to go through the process of success, we want it to fall on our lap. We have a microwave mentality, a pattern of quick success without having done anything. If we allow our thought processes to work like that it's a clear indica-

tion that we didn't do proper calculation. Without the process to success there is no understanding of preservation of the success, that kind of success becomes a come and go type which ultimately brings stress. The process to success prepares us and enlightens our way of understanding. We can only properly take care of what we comprehend, we must be open minded and admit that any success without the process is potential hazard.

**Teboho Matjeka**  
63574502/58911803





# Moruo o theohile

## Tšeliso Thakholi

**M**otlatsi oa 'Musi e Moholo oa Banka e Kholo ea Lesotho (CBL), Monghali Lehlomela Mohapi o re moruo oa Naha ea Lesotho o theohile ka 4.5% mathoasong a khoeli ea Pherekhong ka lebaka la khaho ea litsela, tšebetso e fokotsehileng ea tlhahiso ea thepa ka lifemeng le tšebeliso ea lipalangoang. O buile tse na 'mokeng oa bo-112 oa Komiti ea Maano a Lichelete (MPC) tsa CBL o bileng Lehakoe, Maseru ka la 25 Tlhakubele 2025.

Mohapi o re leha ho theoha ha maemo a moruo ho ntse ho hana ho ea meriting, ho tloha 'mokeng oa ho qetela oa MPC oo ba bileng le ona nakong ea ho feta, lefatše ka bophara ho ntse ho hlokahala botsitso le bofokoli bo bohola ma-

lapeng haholo-holo a nang le likhoabo. O re litheko li nyolohile ka 4.1% ka khoeli ea Hlakola monongoaha ha li ne li tloha ho 3.6% ka Pherekhong. "Sena se bakiloe ke keketseho ea litheko tsa lijo, lino, motlakase le khase." A rialo a bile a eketso ka hore ho nyoloha hona ho bakiloe ke khaello e kholo ea poone e tšoeu.

H'a tsoelapele, o re ka Pherekhong 2025 phepele ea chelete Naha ka bophara e ile ea eketsoa ka 2.5% ka morero oa hore e khutlise keketseho ea 2.4% e tlahiloeng ka Tšitoe ngoahola. A thatiselletsa ka hore ho theoha hona ho bakiloe haholo ke lintlha tse fetisitsoeng ke Lekala la Khoebotse bontšang litheko tse tlase tsa bareki le ho fokolaha moruo.

O boetse a tokoboketsa hore litlaleho tsa litšebeliso tsa lichelete tsa 'muso li bontša hore li ile tsa hakanyetsoa ho 22.1% ea GDP ka Pherekhong 2025, e le ho khutlisa sekhahla sa 0.3% se ileng sa hlokomeleha ka Tšitoe 2024. A re

tswana li ile tsa susumetsoa haholo-holo ke lekhetho la SACU, leo e leng lona le

ileng la eketsa ka potlako ho feta litšehenyelo. A boela a supa hore mekitlane ea sechaba e theohetse ho 58.0% ho tloha ho 58.4%.

A qetella ka ho bontša hore ka mabaka ana le a

mang komiti e entse qeto ea hore sekhahla sa tsoala se sale se ntse se lutse ho 7.25% bakeng sa selemonsena, ha sesiu sa Naha ea Lesotho machabang e le US\$105.23 Millione.



# RSL e nanabetsa letsoho

## Tšeliso Thakholi

**S**etsi sa Lesotho sa Litšebeliso tsa Lekhetho (RSL) se nehelane ka ntlo ea bohloeki ho Sesole sa Lesotho, e nang le liphaposi tsa ho hlapela le matloana a boithuso a banna le basali, e tlang ho sebelisoa nakong ea lipapali. Tšebeliso ena e bile Boema-fofane ba Sesole sa Lesotho ba Mejametallana, Maseru ka la 25 Tlhakubele 2025.

H'a nehelana ka mpho ena, puong ea hae eo a ileng a e teka kapel'a Bo-



laoli ba Sesole sa Lesotho 'moho le baphatlalatsi ba litaba ba neng ba phuthelile ka bongata bo boholo,

Komishinara ea RSL Mofumahali 'Mathabo Mokoko o boletse hore leano la bona la tšebetso le tšoana hantle

le neheletsano ea lesokoana, e totobatsang matla a tšebeliso 'moho e le ho fihlela katleho.

A re ka ho fetisetsana lesokoana e mong le e mong o bapala karolo ea bohlokoa ka kopanelo, sena se tiisa hore kopano ke matla molemong oa katleho le kholo ea sechaba. A re phano ena ea ntlo ke mohato oa bohlokoa oa boikopanyo le ho khotalletsa bophelo bo botle ba besebeletsi ba litsi tse tse peli 'moho le sechaba ka kakaretso.

A ipiletsa ho bahoebi le batho bohle ba boithatelo bo botle ho tla sebetsa 'moho molemong oa ho tšehetsa merero ea mofuta ona kaha e sa fane ka bophelo bo botle ho sesole feela, empa e le molemong oa sechaba ka kakaretso. A tiisa hore mamati a butsoe ho tla sebetsa 'moho bakeng sa ho bopa sechaba se phetseng hantle. A re joalokaha mpho ena e tliil'o sebelisoa nakong ea lipapali, sena se tla thusa bacha ho tloha linthong tse ka senyang bophelo ba bona, 'me ba itahlela ka setotsoana

lipapaling bakeng sa bokamoso ba bona bo phethehileng.


H'a amohela mpho ena ea bohlokoa, Molaoli oa Sesole sa Lesotho, Leut. Gen. Mojalefa Letsoela o qalile pele ka ho isa liteboho tsa hae tse khethehileng ho botsamaisi bohle ba RSL ka mpho ena e kanna-kana. A re kamehla litho tsa tšireletso li khotalletsoa ho boloka bohloeki ka linako tsohle, ka hona sena se tlii boela se matlafatsa taba ea bohloeki haholo. A itlamba hore sesole se tla lisa le ho hlokomela hore e lula e le maemong a matle ka linako tsohle e le hore e tle e tsebe ho phela nako e telele.





# MOB KIDDS EDUTAINMENT

**Puzzle MOB 93-4579**



**Across**

- 5 Nyeliso ea motho (10)
- 8 Lentsoe phophoma le ka sebelisoa ha ho buoang ka'ng? (5)
- 9 Patsi e khathiloeng, ea nt'o petsoloa. (7)
- 11 'Mala oa phoofolo (6)
- 12 Kobo ea Borena ba Phokeng ke Lesane, e be ea Borena ba Basotho e bitsoang? (7)
- 15 Moetapele oa lipolotiki ea qetang ho phallela lihlopha tsa bolo ea maoto Quthing. (9,8)
- 17 Molula-Setulo oa Likomiti tsa Paramente ea Lesotho hajoale. (8,12)
- 18 Mofuta oa sehlahla seo hangata lihoai li se behang tlasa sesiu se tšetseng lijo-thollo (7-5)
- 19 Mofuta oa linaleli (14)


**Down**

- 1 Lijo tsa banna tse jelloang sakeng. (8)
- 2 Sehlopha sa bolo ea maoto se rehelletsoeng ka lebotho. (7)
- 3 Lentsoe le bolelang ho sebetsa 'moho, letsema. (7)
- 4 Lijo tsee li jeoa ke bo mang (Qati)? (10)
- 6 Poone, mabele, koro, linaoa le lierekisi (4-6)
- 7 Bopa mareho-mararetsi ka mantsoe ana: mpe, mahlo, mali, khubelu (5-8)
- 10 Ngoana ea mong habo. (9)
- 13 Mabele a makhutsoane a behang lihloho tse kholo kapa tse tenya. (9)

- 14 Mokhotlong ..... (9)
- 16 Nyenyefatso ea motho (8)

**SOLUTION**

**MOB 93-4578**







# TSA KEREKE

## Baena ba phatlalatsa meralo

**Tšeliso Thakholi**



**M**ookameli oa Kopano ea Baena ba Setefane, Mafisa Fobo o hlalositse meralo ea bona ea tšebetso, kapel'a batsoali bao bana ba bona e leng litho tsa Kopano, phutho ea letsatsi le le leng e bileng Parishing ea Maria Mofumahali oa Lefatše, Mazenod ka la 23 Tlhakubele monongoaha moo a boletseng hore ba na le liofisi tse 'ne tse sebetsang 'moho le Komiti e Kholo ho etsa tšebetso e tsoileng matsoho, etsoe kopano ke matla.

A bontša hore Ofisi ea pele ke ea Tšebetso, e lateloa ke ea Pina, ea Lithekiso le Lipapatso le ea Meralo ea Tšebetso. A re hara e meng ea meralo ea bona ke ho bona hore Kopano e'a iphelisa ka ho etsa 'li-Fun Walk' ka sepheo sa ho tsebahatsa CD ea bona e ncha e leng BASA 6, e tli'o tsoa haufinyane. A re ba boetse ba tllilo lokisa 'System' ea bona e le ho nyolla mokotla, ho eketsa 'li-cassock' le ho sebelisoa lintlheng tse kang tsa lipapali le mopheho.

A re kahare ho Kopano ba na le maemo a thuto a litho tse fapakaneng tse kang, tse ntseng li kena

sekolo, tse sa atlehang likolong, tse sebetsang le tse sa sebetseng. A ipiletsa ho batsoali ho kenya letsoho le toma, ka litsebo tseo ba nang le tsona ho tšehetsa mekhahlelo ena, molemong oa ho matlafatsa Kopano, Kereke le ho ba le bokamoso bo phethahetseng.

Mongoli e Moholo oa Kopano, Tankiso Majara h'a lokolisa ka botebo tšebetso ea liofisi tsena tse reretseng ho bona hore Kopano e etsa mosebetsi o motle, o itse mosebetsi oa Ofisi ea Tšebetso ke ho bona hore Basebeletsi ba ba teng litšebelatsong tsohle tsa Kereke, ho fihla metso e 15 pele litšebelatsong li qala, ho khetha setho

se tsebang ho sebeletsa le se ntseng se ithuta nakong ea litšebelatsong le ho boloka bohloeki ka Sakristeng.

A re Ofisi ea Pina mosebetsi oa eona ke ho lokisa pina kahare ho sehlopha ka mekhahlelo e fapakaneng. A tsoelapele ho supa hore Ofisi ea Thekiso le Lipapatso ke ho rekisa le ho tsebahatsa lihlahisoa tsa bona tse kang tsa 'mino oa bona le likipa tsa Kopano. Ha Ofisi ea ho qetela e le ea Meralo ea Tšebetso e tla thusa Kopano hore e tsebe ho phela le ho phelisa litho tsa eona. Kamorao ho litlaleho le ho lokolisa meralo ea bona e bile lipotso, litlhahiso le likhothaletso ho tsoa ho batsoali.



### 2024-2025 SELEMO C

#### SONTAHA SA 4 SA KARISIMA

Joshua 5,9.10-12

Pesalema 33

2Ba-Bakorinthe 5:17-21

Luka 15:1-3.11-32



**Khothatso**

### Libopuoana tse ncha

Kajeno lena ha re shebeng mantsoe a hlahang Mangolong a Halalelang a bolelang hore motho ea ho Kriste o bopuoana bocha, tsohle tsa khale li fetile 'me tsohle li nchafetse. (2 Ba-Korinthe 2:17). Mantsoe ana a akaretsa morero oa Morena mabapi le motho. Motheo oa tsena tsohle o hlaha boprofeteng ba Testamente e Ncha, bo phethahalitsoeng ka Kriste ka hona bo bolela hore rona re libopuoana tse ncha tsa Morena Molimo.

Bongata ba Bakriste e ka 'na eaba ha ba utloisise hantle taba ena ea ho shoa, ho patoa le ho tsoha le Kriste re le libopuoana tse ncha (Ba-Roma 6:4) Ha re e hlahlobeng; tšimolohong, "Morena o ile a bopa motho ka lerole la lefatše 'me a bululela ka ho eena bophelo, eaba motho o fetoha sebopuoana se phelang." (Genese 2:7) Ka mantsoe a mang Morena o bopile 'mele eaba o o fa "moea oa motho," (Jobo 32:8; Matheus 26:41) eaba e ba moea o phelang. (Luka 1:46-7; Ba-Heberu 4:12) Morena o bopile motho a e-na le moea, nama le moea o fang 'mele bophelo, hobane 'mele o hloakang moea o shoele. (Jakobo 2:26) Morena Jesu o re, "Ke moea o fanang ka bophelo, nama ha e na thuso." (Joannes 6:63)

Buka ea Genese e re ruta hore Morena o bopile motho ea halalelang; ka setšoantšo sa hae (Genese 1:26; 5:1) 'me a bona hore seo a se entseng se setle. (Genese 1:31) Kamora ho bopa tsohle Morena a beha Adama le Eva Serapeng sa Edene (Genese 2:15) 'me a ba laela ho se je sefate sa tsebo ea botle le bobele. (Genese 2:16-7) Empa joalokaha re tsebe ba ile ba se ja eaba sebe se kena lefatšeng. Satane a fetoha "khosana ea lefatše" (Joannes 12:31) Adama le Eva ba lahlehela ke boleng ba bona ba tšoana ea Morena.

Kotlong eo ba e filoeng ba bolelloa hore ba tla khutlela leroleng le ba bopileng, (Genese 3:19) 'me mona Morena o na bolela hore leloko lohle la Adama le tla shoa lefu la moea, kamora ho amohuoa botle bohle bo tsoang ho Morena Molimo.

Bana be'so "popo ea rona e ncha ke lintho tsohle!" (Ba-Galata 6:15; 2 Ba-Korinthe 5:17) Moea oa rona o mocha, o hloakang sebe ka Sakramente ea Tlhatsuo, ke mpho ea Molimo e nang le peo ea hae. (1 Joannes 3:9) Ka Kriste Morena Molimo o etsa boipiletso ho rona, hore re sokolohe 'me re boelane le eena. Ka lebaka la rona Molimo o entse Kriste sebe, ea neng a sa se tsebe ho hang e le hore ka eena re be ba lokileng mahlong a Morena.

Ka hona ha re tebiseng maikutlo ka bohlokoa ba hore bohle ba amohela Sakramente ea Tlhatsuo, e le hore le bona ba boelane le Molimo Ntate. Haeba ho na le motho eo u mo tsebang ea sa hlatsuoang ka lebaka la ho hloka tsotello, ka ho phatlalatsa Molaetsa o Molemo o mo khothaletse ho amohela limpho tsa Morena mahala ka potlako. Taba ena ke ea tšohanyetso hobane ha ka hloka hahala kajeno kapa hosane a sa tsoaloe bocha, moea oa hae ha o na ho kopana le manyeloi le bahalaleli.

### Bahalaleli har'a Beke

- 31 Tlhakubele Daniel
- 1 'Mesa Theodora
- 2 'Mesa Appian
- 3 'Mesa Fara
- 4 'Mesa Plato
- 5 'Mesa Zeno



# Liki ea Likolo tse Phahameng

## Tšeliso Thakholi

**B**okamoso ba papali ea Basketball e tliil'o ba bo khanyang, 'me sena se pakoa ke ho thakhoha lekhetlo la pele ha litlholisano tsa Liki ea Likolo tse Phahameng tsa Papali ea Basketball kamor'a nako e telele, tse ileng tsa tsoelapele ka katleho e kholo Mabaleng a Sekolo se Seholo sa Machabeng, Maseru ka la 23 Tlhakubele 2025.

Phala ea Mokhatlo oa Papali ea Lesotho ea Basketball, Sam Motsamai o re ba motlotlo haholo ka ho thakhoha ha liki ena kaha e tliil'o ba thusa haholo ho holisa le ho matlafatsa talenta ea papali ea Basketball. A re hara e meng ea meralo ea bona ke ho bona hore papali ena e anela likolong tsohle. Har'a likolo tse thakhotseng lipapali tsa liki ke Machabeng College, Likolo tse Phahameng tsa Sefika, Leqele le Phomolong.

Ka thabo e kholo, Motsamai o re se ba hapileng maikutlo ke hore ba sebetsa



'moho ka mofuthu le litichere hona likolong moo hobane le tsona li ikakhetse ka setotsoana le ka thahasello e kholo ho tsohana le talenta ea Basketball baneng. A tiisa hore bana ba Basotho ba atleha haholo ho bapala papali ea Basketball.

Ho feta moo, a re ka mona ka Likolong tse Phahameng ba li arotse ka litikoloho tse

tharo e leng Maseru, South le North, 'me lihlopha tsa tikoloho ka 'ngoe li'a bapalana. A qetella ka hore mokhatlo oa habo o tsoere ka thata ho tsoma talenta kaha sena se tliil'o thusa ho holisa papali ea Basketball.

Ho sa le joalo li ile tsa bapala tjena mafelong ana a beke: ka ho banana Sekolo se Phahameng sa Sefika

3-28 Sekolo se Phahameng sa Leqele, Machabeng College 20-0 Sekolo se Phahameng sa Sefika le Machabeng College 21-8 Sekolo se Phahameng sa Leqele.

Ha ka ho bashanyana Machabeng College 37-6 Sekolo se Phahameng sa Sefika, Sekolo se Phahameng sa Leqele 22-6 Sekolo se Phahameng

sa Phomolong, Sekolo se Phahameng sa Phomolong 11-35 Machabeng College, Sekolo se Phahameng sa Sefika 15-41 Sekolo se Phahameng sa Leqele, Sekolo se Phahameng sa Phomolong 16-35 Sekolo se Phahameng sa Sefika le Machabeng College 37-21 Sekolo se Phahameng sa Leqele.

## Liki ea rugby e thakhohile

nakong ea papali.

Sena se ile sa bonahala haholo nakong eo NUL



## Tšeliso Thakholi

**L**iki ea papali ea rugby e thakhohile ka sefutho se seholo Lebaleng la Setsi sa Koetliso ea Maoblata, Roma ka Moqebeloa oa la 22 Tlhakubele monongoaha, moo teng

barati ba bangata ba papali ea rugby ho hlaha ka makhalo ho fapakana, ba ileng ba boha ha ngoale e khiba ha lihlopha tsa Lesotho Rugby Academy le NUL Spears tsa banna le basali li ntšana bothaka.

Papaling ea pele ea basali ke moo NUL Spears Ladies e ileng ea iketsetsa

borata ka Lesotho Rugby Academy Ladies ka ho e tlabola 20-0. Papaling ea bobeli ea banna e bileng lipakeng tsa NUL Spears le Lesotho Rugby Academy, babohi ba ile ba opa liatla le ho thoholetsa ka litlatse tsa thabo lihlopha tsena tse peli ka 'mapalo oa tsona o holimo o ileng oa bonahala

Spears e neng e hlaba 'li-Try' lenyele-nyele, khahlanong le Lesotho Rugby Academy e ba e ikhabela papali eo ka ho e sasara 51-31. Leha papali ena e bile e matla haholo e khahlang mahlo e qalang liki, ha ho ka ha eba le likarete tse tsoang tse supang hore libapali li bile le likoli

ho fihlela papali e ba e fihla pheletsong. Empa ka holimo ho tsohle batho ba bangata ba neng ba le teng lipapaling tsena, ba ithutile hore Lesotho Rugby Academy e itokisitse haholo papising le ngoahola 'me lihlopha tse sa ikatlang li tliilo kopana le pela li falla.

Monghali Justice Tshola ka boemo ba hae e le mokoetlisi oa sehlopha se lahlehetsoeng ke papali sa NUL Spears o re seo a se boneng papaling ena ke hore e bile e matla haholo le ho ba monate ka ho fetisisa, empa ba ile ba lahlehela ke papali ka lebaka la liphoso tse nyenyane tseo ba ileng ba li etsa tseo a li hlokometse, "tseo re tliil'o li lokisa."

"Taba e ileng ea etsa hore re hlajoe lintlha tse ngata ke hlokometse hore ke liphetofo tse ngata tseo re ileng ra li etsa ho leka ho hapa papali." O bole-tse joalo a bile a eketsa ka hore ba ile ba iteka haholo ho hapa papali empa bohola ba 'li-Try' tseo ba li hlabileng e bile tsa libapali ka bongoe e ne e se tsa moo ba sebelitseng 'moho e le sehlopha, "e leng hona moo re tlang ho lokisa teng."



# Likuena e phoqa Basotho

Ke 'nete libapali tse kang Motebang Sera le Jane Thabantšo bao e leng bona

## Tšelisothakholi

“Ruri Likuena e ne e sa lokela ho bapala papali ena hobane ha e'a itokisetsa... Sehlopha se itokisetsang ho ea bapala Mohope oa Lefatše ha se ea lokela ho etsa liphoso tse kang tsena. Re qala ho bona Likuena e bapala tjena haholo-holo papaling ea pele le Bafana Bafana.” Tsena ke tse ling feela tsa lipuo tsa khalefo, ho utloa bohloko le ho khatlala matla malebana le lipapali tse peli tseo Likuena e seng e li bapetse, tsa ho phunyeletsa ho ea Mohopeng oa Lefatše.

Barati le batšehetsi ba Sehlopha sa Naha Likuena ba ne ba bohile lipapali tsena ka libeliso tse phahameng haholo hore kajeno e tla ke e etse ntho'a mehla haholo-holo ha e ne e bapala le Bafana Bafana ka ho thabisa sechaba. E le ho bontšha tšepo le lerato ho sehlopha sa bona, ba bang ba bile ba tela lichelete tsa bona, haholo ha e ne e ba-



pala le Bafana Bafana ba ea inoesa ka nkho ha e bapalla Afrika Boroa. Basotho ba itela ka lebaka la lerato le tšepo!

Papaling ea pele ea Bafana Bafana ho bonahetse hore Likuena e ne e na le menyetla e mengata ea ho hapa papali, empa mokoetlisi a tlaila thifa ka ho se etse liqeto tse nepa-

hetseng. Empa bohle ba ne ba ntse ba e-na le tšepo ea hore mohlomong ha li khutla khafetsong ho tla ba le lipheto, athe e se e le eona tšebetso ea letsatsi leo moo e ileng ea lahleloa ke papali eo ka ho shapua 2-0.

Ke hona moo barati ba hlileng ba qala ho koma-koma hang hoba menyenyet-

si e supe hore libapali tse ling tse kotsi tse kang bo Lemohang Lintša, Lehlonolo Fothoane le Hlomphe Kalake o ba boloketse papali ea Rwanda, 'me ho ile ha fela ha eba joalo a etsa lipheto tseo a neng a lokela hore ebe o ile a li etsa papaling e fetileng. Ke ha a tla bapala ka ho lekana le Rwanda ka 1-1.

bahlaba-lintlha ba kotsi ba ne ba le sieo tlasa maemo a fapakaneng a bophelo. Hajoale Basotho ba se ba qalile ho bala menoana hore na Likuena ha e ka hlola eng e ka ba le menyetla ea ho fetela pele. Ka kakaretso ho ntse ho hlaka hore Lesotho le sa na le mosebetsi o mongata tseleng ea bointlathatso.

# Maseru e tšoara Top 8

song. Li tla kenela lihlopha tse peli tse kotsing e kholo ea ho tla rathoa ke selepe

hlopha ka bobeli li saletsoe ke lipapali tse supileng pele li phethela lipapali tsa tsona



## Tšelisothakholi

Tang-tang e tla khangoa ke lerole ha lihlopha tse robeli tsa mokhahlelo o ka tlase oa Maseru Women First League, li tla be li thulana sa lipheleu lipapaling tsa mantšano, tsa ho phunyeletsa ho ea Liking e Kholo ea Basali ea Women Super League. Lipapali tse-na li tliil'o bapalloa Lebaleng

la Bambatha Tšita Sports Arena, Maseru ka la 29 Tlhakubele monongoaha.

Papali ea pele e tliil'o ba matla haholo ke e lipakeng tsa Team Go Ladies eo e leng bona bompoli ba li hulang pele Liking ea Roma le Mpaola United Ladies, papaling ea bobeli Villa Ladies e tla isana holimo le tlase le Khabisi Ladies. Papali ea boraro Emmanuel Ladies e tla koebana le sehlopha sa mehlang sa Women Super League, se kileng sa tuma ka papali ea

sona e tsoileng matsoho sa Rovers Ladies. Athe papali ea ho qetela Hunters Ladies e tla kolokochana le Massive Ladies.

Lihlopha tse 'ne tse tla hlola li tla bapala lipapali tsa 'li-quarterfinal,' moo tse peli tse tla hapa lipapali tsa tsona li tla ea ho seka-makhola-khang, ebe tse peli tse hlotseng li bapala makhola-khang ho tseka maemo a pele le a bobeli ka tatellano, li ntan'o fetela Liking e Kholo ea Women Super League ha lipapali li fihla phelet-

ha Liki e Kholo e fela e leng Thaba-Tseka Ladies le Bantu Ladies tse maamong a borong le a leshome ka tatellano.

Thaba-Tseka Ladies e maamong a borobong ka lipapali tse 11 ea hlola tse peli ea bokeletsa lintlha-khoho tse tšeleletseng feela. Athe Bantu Ladies eona e bapetse lipapali tse 11 ha e-s'o hlole leha e le papali e le 'ngoe, 'me e tliil'o theohela mokhahlelong o ka tlase oa Women First League e se na lintlha-khoho ho hang. Li-

tse setseng.

Ho ea ka Mokoetlisi oa Team Go, Tšepo Khosi sehlopha sa hae se malla-a-laotsoe ho tla e hlana-ka, 'me thomo ea hae ea mantlha h'a ne a qala ho koetlisa sehlopha sena ke ho sebetsa ka thata hore se fihle Liking e Kholo. A eketsa ka hore o mong oa meralo ea bona ke ho bapala ka boitelo le ho kopanya bana ho ba 'moho, e le ho bopa sehlopha se le seng se matla se kopaneng se tla tseba ho hapa liki.



# Lelapa la Busa le itlhome pele



## Nthabeleng Seitlheko

**L**elapa la Busa Ha Sekake le tlohile tlholisanong ea liphoofole e neng e ts'oaretsoe Ha Sekake lekhetlo la bone, ke Mokhatlo oa Patlong Breeders Association le kiba-kiba ka limpho le ho hapa mojado oa pele oa Ramo ea selemo. Litaba tsena li bile ka la 20 Tlhakubele Monongoaha.

Koetjoe Busa puisanong le Koranta o itse joaloka mocha ea ntseng a laba-labala bophelo bo atlehileng, ho bile ho se mesebetsi o ile a qalella leeto la ho ithuta ka leruo la farelane le seiboko ka selemo sa 2015 a se na leseli la tsona, empa a phehella ho fihla ka selemo sa 2017, 'me ba atleha ho fumana boemo ba pele litlholisanong tsa naha, bo ileng ba etsa hore ba iphumane ba na le ramo e hlahang kantle ho naha.

O re ho tloha ba qalile mesebetsi oo, esale ba ntse ba kenela litlholisanano ba sa atlehe, empa ba qalella ho ithuta ka mekhoha e nepahetseng ea ho hlokomela phoofole le mekhoha ea ho e fepa.

"Ha se ntho e bonolo ho phela le liphoofole kaha li hloka tlhokomelo e ikhethang le nako." O boletse joalo. Ha joale o re ba se ba hlahisitse liramo tse ntseng li hola tse 15 le ho feta.

O khothaletsa bacha ho ikhira kaha mesebetsi e sokulisa, ba kene ka matla litabeng tsa leruo la farelane le seiboko, kaha ho lona motho a ka tseba ho iphelisa ka mekhoha e fapakaneng joaloka thekiso ea boea, liramo le linku.

Motlatsi oa Mookameli oa Southern Mountains Association for Rural Transformation and Development (SMARTD) Fako Fako, o supile hore ha babua ka

farelane le seiboko mekhatlo e etsa mesebetsi o ba hlophelang hore ha ba ea litlholisanong tsa setereke le tsa naha. O itse ba il'o lokisa moo ba boneng ba fokola teng kamor'a tlholisanano ena kaha ba rata ho bona Setereke sa Qacha's Nek se khutletse boemong ba sona ba ntlafalo ea boea ba boleng le tlhahisong e ntle ea liramo.

A re ho hlahlojoa liphoofole sefahla-mahlo ho thusa lihoai ho ntlafala mesebetsing oa bona. O re taba ea farelane le seiboko e thusa haholo tlhahisong ea mesebetsi le moruong.

Lebitsong la Mookameli Lekaleng la Temo le Kanetso ea Lijo Tholang Nokotjoa, o hlahositse hore farelane le seiboko li boemong ba bone lefatšeng, 2.7% ke boemo ba bona ba setereke 'me ba ikemiselitse hore ka selemo sa 2027 ba ntše boea ba 1.2% naha ka bophara ha Qacha 's Nek e lebeletsoe ho hlahisa boea bo etsang 0.7%.

Morero o tataisang Lihoai tse ntseng li Thuthuha (SADP II) o na le batho ba

10 ba ntseng ba koetlisoa ho hlahisa liramo kahar'a naha hore lihoai li se hlole li li kantle ho naha. A re sechaba se sebelise libaka tsa tipi ka nepo hobane li le molemong oa sona, 'me seo se tla bonahala ka palo e holimo ea liphoofole tse eang moo.

Ho bontša hore Naha ea Lesotho e phamoletse litaba tsa farelane le seiboko holimo sebaka sa temo ke 10% sa liphoofole ke 66%, moruong oa naha farelane le seiboko li kenya 32%.

Mookameli oa Likiri Qacha's Nek Khoaele Nyakane, o itse phoofole e batla motho ea e tsotellang, ea nang le mamello le kutlo kaha le eona e le motho. A re e bang sechaba se sengata se ka tsetela liphoofole, tlhahiso ea mesebetsi e tlab a pale ea maobane hobane ka leruo la farelane le seiboko bacha ba ka iphelisa, ba ithehela mesebetsi ba ntse ba sebetsana le mabaka a mang a bophelo. O re phoofole le eona e ntse e hloka barutehi e seng batho ba etsang lintho feela.

Mookameli oa Sepolesa

Ha Sekake Hlalele Machamise, o supile hore bo-sholu ba liphoofole ke pale ea maobane sebakeng seo kaha esale a fihlile kahar'a ofisi eo ho se tlaleho eo a ileng a e fumana, empa ho setseng ke qholotso ea liphoofole tse lisetsoang maboelleng, tseo kamor'a likhoeli tse tharo li le sekete, beng ka tsona ba sa itlalehe a lokelang ho li fantisa.

Morena oa Patlong Makoko Makoa, o bontšitse hore Basotho ba ts'oere ka thata tlhahisong ea farelane le seiboko empa qholotso e kholo ke phetoho ea boemo ba leholimo kaha liphoofole li hlaseloa ke mafu le ho shoa ka sekhahla ka lebaka la maemo a leholimo a hloabaetsang.

A re ho se boloke makhulo ho etsa hore tlhahiso e ameha kaha lekhulo la liphoofole e ba bothata, ka hoo ho bohlokoa hore bohle ka mekhatlo ea bona ba nke

jeno sechaba se tseba ho itlhalisetsa lijo tsa liphoofole, ho ikhira le ho ikholla bofumeng.

Nku e hapileng mojado oa pele e nang le boea bo mahareng, ke ea Nkopane Nkopane ho hlaha ho Sisinyehang Lihoai Breeders Association, e hapileng mojado oa boea bo botle bo hloekileng, ke ea Rorisang Marotholi, ho tsoa ho Rutehang Lihoai Breeders Association, e boea bo botle ka ho fetisisa ke ea Mosoeru Busa ho hlaha Patlong Breeders Association. Poli ea selemo ke ea Mpho Senone ha ramo e le ea Mosoeru Busa.

Mekhatlo e neng e kenetse litlholisanano tsena, ke Matlafalalang Lihoai Breeders Association, Maele Lihoai Breeders Association, Sisinyehang Lihoai le Patlong Breeders Association. Litlholisanano tsena ke boitlhopho ba tse lokisetsang



boikarabello ba ho a baballa le ho tlosa lihlabana-hlabane ka mefuta ea tsona.

O lebohile mokhatlo oa SMARTD ka tataiso ea bona, hore ebe leruo la bona le ea ntlafala le ho fetola bophelo ba bona, ka-

lihoai tsa litereke tse tla ba ka la 22 ho isa la 24 'Mesa monongoaha.

Ba keteka ka mohoo o reng, "Farelane le seiboko ke tšia ea boitšematlelo moruong oa malapa a Basotho."

